

bonnes prises, comme de brochets, esturgeons, pois-  
186 fons blancs & des car || pes, qui ne sont neantmoins  
telles, ny si bonnes, ny si grosses que les nostres de  
deça, puis plusieurs autres especes de poissons qu'on  
ne cognoit point icy.

Le bled d'Inde que nous mangions en chemin, ils  
l'alloient querir de deux en deux iours au fond des  
bois & en des certains lieux escartez, où ils l'auoient  
caché en descendans, dans de petits sacs d'escorces de  
bouleau, car autrement ce leur feroit trop de peine  
de porter tousiours quant & eux tout le bled ou les  
farines, qui leur sont necessaire \* pour leur voyage, &  
m'estonnois grandement comme ils pouuoient si bien  
remarquer tous les endroits où ils l'auoient caché sans  
se mesprendre aucunement, bien qu'il fust souuent fort  
esloigné du chemin, & bien auant dans les bois, sous  
quelques mottes ou enterré dans le sable.

La maniere & l'invention qu'ils auoient à tirer du  
feu, & laquelle est pratiquée par tous les peuples sau-  
uages & barbares, est telle & si admirable qu'elle ne  
se peut assez admirer, & louer le diuin Auteur d'une  
telle merueille. Ils prenoient deux bastons de bois de  
faulx, tillet ou d'autre espece, secs & legers, puis en  
accommodoient un, d'environ la longueur d'une cou-  
dée ou peu moins, & espais d'un doigt ou environ,  
& ayans sur le bord de sa largeur caué de la pointe  
d'un cousteau ou de la dent d'un castor, une bien pe-  
tite fossette, avec un petit cran à costé, pour faire tom-  
ber à bas sur quelque bout de mesche ou chose propre  
à prendre feu, la poudre reduite en feu qui deuoit  
187 tomber || du trou, ils mettoient la pointe d'un autre